

# OMUKWETU

No. 19

Registered at the GPO as a Newspaper

12c

## Omuyevangeliste a ningi omuwilikingleka

Oshigongingleka oshiti 8 mOngeleka onkwaevangeli paLuther yaAaluudhe mUu-shimba (ELK), osha hogolola omusitagongalo Hendrik Frederik a ninge omuwilikingleka omutiyaali mewiliko lyOngeleka ndjoka.

Omuwilikingleka gwtotango okwa li a hogololwa 1972, Ongeleka ndjoka sho ya zi miikaha yaatumwa Aandowishi konima yomimvo konyala 200.

Omusita Frederik, ota ka wilika lilyo 173, 353 yi li momagongalo ge thike puukuluntu we 44, ga topolwa miitayingeleka yomwaalu gu thike poluvalo lwe 6.

Tate Frederik, okwa pitile uulongi muAugustinium, mOkahandja 1953 moka wo a nongeke omimvo 4. Mo 1959 okwa piti mosikola yaayevangeliste muPaulinum manga yi li mOkariveva (Karibib).

Omimvo ndatu okwa longo ongomuyevangeliste manga inaa ka tskila eilongo lyuuteologi mosikola yuusita muPaulinum sho ya tembukile mOtjimbingwe 1963.

Omulumentu gwOmunama komuhoko, kuye ngiika osha li lwotango okukalathana nAawambo mosikola ndjoka. Muule womwedhi netata okwa li a sindana mokutaaguluka ashihe shi na ezimba lyuukwamuhoko, negumbo lye pamwe name Johanna gwe, omukiintu omugundjili nemusosiale, konyala li lukwe egumbo lyAawambo mosikola ndjoka.

Ye mwene ohi imemeha kashona kowala, ihe moshipala omuntu oto lesa mo ombepo yuukuume noohapu dhe ihadhi thigi omuntu inoo lala ongali sho to yolo. Puye aanona ohaa dhimbwa kutya oye li nomukuluntu.

Egongalo lyaKaribib olyo unene li shi oku mu hokolola sho e li yakula tango ongomuyevangeliste nokonima ongomusitagongalo. omimvo 3 kuBethanie nako wo okwa longa ko oshilonga shevangeli omimvo 6.

Ongeleka yawo sho ya mono eipangelo 1972 oye gumwe gwaavalelwamo aashona ya li yi inekelelwa okukwata komiya dhewiliko okuyambidhidha oonkatu dhokahanona komeipangelongeleka. Kapu na omalimbililo, oshe ya pula eiyambo enene.

Tala kep. 2

Osha fa kutya omudo wounona fiyo opaapa twa nyengwa okushangela sha ounona vetu. Omafaneko mahapu a ningilwe ngashi koshikandjo shomusika inaa mona natango enyamukulo.

Kaume ketu ou mefano okwa fa nee te likwafa ye mwene.



# Omuyevangeliste a ningi omuwilikingeleka

Dha za kep. 1

Okuza peipangelo lyOngeleka, okwa kala amushanga omukuluntu gwOngeleka onkatu ndjoka ye mu egululile uuyuni wopondje mokukalela po olwindji Ongeleka yawo miigongi kombanda yomafuta.

Oonkatu dhimwe dhomekoko lyOngeleka ndjoka uule womimvo 6 dha zi ko, o-dhi shi wo okutumbulwa mpaka:

Shotango oya li yotango okuzimina ekotampango lyaVELKSWA, ehanganano lyoongeleka oonkwaLuther moshilongo. Patiyali oya ningi omutango mokuyapulila aakiintu muusitagologo.

Ondjodhi yawo ando Ongeleka yawo noyaELOK dhi hengumukile mumwe, oyo tuu inaayi gwanithwa natango, ihe omalongekidho oyo ge li.

Manga inaa taamba uuhamushangangeleka 1972 nomanga nokuli inaa tula elongo lyopausita miilonga, omusamane nguka Frederik okwa kala tango omumvo gumwe 1969 mOseminali yuusita yaMapumulo, kuNatal, ta konakona uuteologi.

Oshinakugwanithwa shi vule ayihe ye yotango, oshi mu li ngashingeyi moshipala; okumona omayamukulo komapulo ge na sha nososiale, uupolotika woshilongo, omahupilo gOngeleka nokuhupitha komeho uukumwe wOngeleka ndjoka yomihoko nomalaka ga yooloka ya putudhilwa okakombo noludhi.

Pamauthompango gOngeleka ye, ewiliko lyOngeleka olya tulwa mo nawa: Otali leshwa ngeyi:

"Omuwilikingeleka ota kalele po paveta Ongeleka momagongalo, miikandjolonga yOngeleka nOngeleka oonkwawo nepangelo lyoshilongo, te shi ningi melongelokumwe nEpangelongeleka nokudhigini-na omakwatathano gOngeleka dhilwe, unene tuu ndhoka dhi li mehanganano pamwe nOngeleka ye."- Pr.19/b-1.

Ngele ota ka kala pashitokolitho shika, na tsikile nomukumo, omaudhigu otaga ka pitwa.

## Komagongalo agehe mOwambo

Aamwatate aaholike, ngashi elaka lyevangeli lye tu adhele miigwana yetu kekwa-tho lyaatumwa 9.7.1870, natse wo natu inyengeni ano okufala etumo muuyuni. Omuwa ta ti:

Umbila oshikwiila shoye kombanda yomeya, ongoye oto ke shi toola ko.



## ONGILISE YUULUYI, EILONGO — Katengela

### Oshipopiwa tala mOmukwetu tagu landula



### Omakuya otaga simpulwa

Oshigongi shaalongi muELOK, alihe, osha li sha gongala mOngwediva petameko lyaKotoba nuumvo. Mestela Katengela Auala okwa li gumwe gwaapopi moshigongi shoka. Miifo tayi landula otatu ka eta iipopiwa yimwe ya simana.

Kala wi imonena okopi yoshifo pomukalo kehe to vulu. "Omakuya oga li taga simpulwa," ngaashi Mestela Mushaandja e shi tala ko.

## INATU EKELASHI ELINEEKELO LETU

Pefimbo eli leepolotika da indakana, ota-pa monika vahapu tava kanifa elineeke-lo. Otali kana moshinima keshe nome-teelelo lemanguluko lavo. Omunhu a teka omukumo, a sholola. Nonge taku tongwa emanguluko, shapu ota pula ashike:

"Oshili, omwa teeela ngaa emanguluko? Shapu eflyo ashike, ile eshi sha ningwa muAngola osho ashike twa tee-lela."

Ovanhu ava ova kanifa eteelelo moimnima tai landula:

a) Ova kanifa eteelelo momaudaneko a-Kalunga eshi taa ti: Exulilo lounyuni nge tali uya, itaku ka kala nande emanya la tenhekwa kulikwao. Omunhu e li moupi-ka wamukwao ngeno a ka tye:

Fye otwa kala hatu imbwa okwoongala mOngeleka yetu, ile ongeleka yetu oya xwikwa po, ovafita vetu ova dipawa ile ova kwatwa nosho tuu. Oto hangika u na oufemba we lixwa po. Hano emanguluko, oshili.

Jesus ta ti; "Aame onde uya okwiingidila eenghwatwa emanguluko novapofi etwikuluko. Ota fufya? Ashishe Jesus a popya, otashi ka wanifwa. Odjapo exunganeke leflyo nenyumuko laye. Mat.16: 21. Ina nyumuka? Hano emanguluko oshili.

b) Ovanhu ova kanifa elineekelo meilikano. Tala u tale oiholekwa; Eilikano mOngeleka eshi taku tiwa: U va alulile nombili kedu lavo, katu va na mokati ketu va aluka nombili?

Ile eshi taku tiwa kutya; U kale ehekeleko laava ve uditile oonakufya vavo oluhodi, katu udite ombili shili, katu na elineekelo kutya hatu ka monafana kwinya meulu?

Twa omukumo ovo va fiwa po kovaholike vavo ..... hamo ve li ve na elineekelo kutya nave ke li mona ngaho omu, ile kwinya ngenge Kalunga a dimbula? Hano inatu ekelashi elineekelo letu.

c) Vamwe ova kanifa elineekelo movakwatelikomesho veepolotika davo meengudu omo ve li notava pangula nokuli unene. Ngaashi pefimbo eli leenghunda-fana da hanga endangalati, da ya mekwena la xula. Ovawiliki navo ova hanga okwena kwa xula, Oiwana ya hangana (VVO), osho S.Afrika.

Ashike nee omuteelelimanguluko nomukondjelimanguluko mukwetu, Kristus wetu ina hanga okwena kwa fita, ina hanga endangalati, iha nyengwa ye iha dopa musha. Nonande to kanifa eteelelo wa fa oukadona vatano vomomulongo, ohaluka ombushiki okwe uya.

Fiyo onena inatu kondja fiyo ohonde. Ovakulunhu otava ti Ounona ve tu etela eshi oSwapo ya ka pula emanguluko. Emanguluko otwe li etelwa kuKristus mwene. Ounona otava pula ashike osho ve shi nyekwa kovatondi. Omaudjuu naa ndubale, efilonghenda laKalunga li lunde pombada.

E. E. E. Kamati

## Omukankaitaalo gwoshimpaga "oonzapu dhaJehova"

Oshimpaga shOonzapo dhaJehova oyo Aayadventiste. Oonakutegela egaluko lyaKristus. Paitaalo lyawo otaa tseya kutya Kristus ote ya unake, nando paMbibeli otaku leshwa "kaku na ngoka a tseya esiku" Mark.13:32

Oshimpaga osha dhikwa kuCharles Russell muNew York, Amerika 1872. Elongo lye otali dhiginine okuhedha popepi kwepangelo lyaKristus kombanda yeve ndyoka taa ti kutya otali ka kala omimvo eyuvi limwe.

Oshimpaga shika ohashi kongo omikalo omipe nkene tashi taandelitha omambo gasho niinyolwa muuyuni. Naakriste oye ndji yomagongalo getu oyi ilandele nenge oya pewa nale omagano gOmbimbeli yawo, okambo komapeko omakukutu okaluudhe.

Ohaku tiwa kutya oonzapo dhaJehova odhi na oshinyanyangidho oshinene muuyuni auhe. Omambo gawo ohaga landithwa kombiliha nenge taga gandjwa oshali.

Oshimpaga shika ohashi ithanwa wo "Aantu yoshungo yelangelo lyoshilongo" (Watchtower People). Mowambo otaa monika opendji tapu gongalele aantu ngaashi mOshakati, mOniipa, Ondangwa naRuacana.

Omambo gawo oge na omadhina taga hili aaleshi ngaashi; "Oparadisa ya kana tayi monika", na "Oshili ndjoka tayi fala komwenyo gwaaluhe." Membo limwe otaa nyola kutya Kristus okwa galukile 1914 e ta dhike epangelo lye nenge oshilongo she kombanda yeve, ihe okwe shi ningi molupe itaalu monika nomeho.

Palongo lyawo Israel yopambepo otayi ka kala naantu ye thike 144,000, omwaalu ngoka gwa kuthwa ngaa mEhololo. Omwaalu nguka pakutseya kwawo otagu yalula owala iilyo yoshimpaga shika, oshoka oyo ayeke aniwa taa yi megulu.

Kaye na oosikola dhelongo lyaantu yawo, ihe otaa ende taa uvitha. Ihaa tungu ongeleka nenge oongulu dhokugongalela mo, ihe ohaa ende nomagumbo taa fatulula elongo lyawo. Shika aniwa osho tashi ya ningitha oonzapo dhaJehova.

Itaa zimine omukriste a ninge omukwiita, oshoka paitaalo lyawo, omapangelo agehe kombanda yeve, ihandhila yasatana, osho wo ongeleka ndhoka dhi na omawiliko nomalandulathano.

Inaa itaala Uukwatatu waKalunga. Oyi itaala Kristus kee thike puKalunga, oshoka oku na iinima yimwe Kristus kee yi shi. Inaa itaala eyumuko lye, inaa itaala epangulo negeelo lyaaluhe.

Opu na ondjila yimwe ayike okuthikame na omalongo ngaka gopombambo: Okulesha nokutseya Ombimbeli nawa komukwanegongalo kehe, okutseya omakotalongo geitaalo ekwaLuther ngaashi taga monika mEtestamendi Ekulu nEpe. Okatekisa okashona nOkanene kaMartin Luther nElongo lyuukriste.

Rev. Eino Amaambo

## Dhama Kristus, e to ningi omusindani

Muuyuni wongashingeyi omu udha aana ndunge naakongi yesimano. Omaufilosofi nomalongo gopamadhiladhilo gomuntu mwene otaga hingi eyendji ya kambadhale okufala aana yaKalunga mpoka yoyene ya hala.

Otaye ya pukitha paupolotika, pankalathano yesiku kehe pamikalo nopamaimbato nosho wo palongelokalunga.

Ongeleka yaKalunga oyo uukwatya woshili, kayi shi uufilosofi nenge sha shilwe sha thikama komadhiladhilo gomuntu.

Oyi li muuyuni nuuyuni ou li mOngeleka.

Otayi kala yi na omwenyo sigo esiku ndyoka Mwene gwayo te yi ile mo muuyuni. Shika osho omukumo kaalanduli yaKristus mboka ya si pamwe naye noya yumuka pamwe naye.

Ngoka ta taandelitha ohole yopaukriste kuyalwe nokweetitha ombili noye wo ta tete oombepo oombwinayi noompukithi.

Shaangoka itaa hempulula Kristus Jesus kutya Oye Omuwa, kee shi gwomuKalunga noshili ke yi shi.

Oshi li olwindji eipulo lyandje kutya uu-kriste wetu owa koka shi thike peni muu-

yuni mbuno wa pilaala. NOmbepo yaKalunga ndjoka yi li putse esiku kehe oku tu pa oondunge nomaengweno, ohatu yi dhimbulula ngaa miilonga yetu yesiku kehe? Oshoka elongelokalunga lyetu oli li miilonga mbyoka.

Ombepo yaKalunga nayi tu pe oondunge nuukonekedhi twaa landule kehe ombepo tayi pepe.

Ngele owi itaala shili Kristus, Oye Omuwa nou li muukumwe wolutu lwe, kolekitha uunkundi woye weitaalo mOmbepo Ondjapuki. Koneka ngoye u galikane opo waa teke omukumo molugodhi lwokukondjitha oombepo nuuhalu wopayuni.

Ombepo yaKalunga ngele oye ku thigi po, ombepo kehe oyi na oonkondo nuuthemba okukutha po ehala lyOmbepo yaKalunga mungoye; wa hala nenge inoo shi hala.

Ihe kombanda yaayihe dhama Kristus e to kala u na omwennyo sigo aluhe.

S.V.V.Nambala



Omwene, longe nge eenghedimhango domondjila yoye, ame ndi diinine fiyo hauxuuninwa.

Nongopalifa nge ndi shiive okuwanifa omhango yoye, ame ndi i lalakane nomutima aushe. Endife nge melila loipango yoye, osheshi onda hokwa mo.

Omesho ange a alula, ko, aha tale koinima yongaho, nyatipalife nge meendjila doye.

Mokanya kange ondjovo ino i mana mo nande, osheshi ohandi tula elinee-kele keemhangela doye.

PS.119:33-35,43

# Mondjokana kamu na muhwepo

Moshifo shaAguste No.15/1979 pepandja 4 omu na oshinyolwa: Aasamane ondjokana omu yi uvite ko tuu? Mpaka onda hala okuyamukula pafupi.

Omusamane manga inaa ninga omusamane petameko okwa li omumati, opo ihe ta zi a ka ninge omusamane. Sho a ningi omumati okwa dhiladhila nduno ondjokana ndjoka ya pula oondunge dhe odhindji opo a hogolole olye e na okuya naye mondjokana, ogwapeni, ogwezimo lini.

Noyendji ya kambadhala nokuli nokwiipu-



Ovakainhu omapenda moshiwana eshi, otaa tende eengongo ndele omaadi tava ka tala nao eefilinga davo koyandede nokwaavo vehee na efimbo. Eshi osho yo tashi ningwa nokombinga yoikwatelwa yokepata. Fimbo vamwe tava uhala tava landalanda uyasha, omapenda otaa tungu oimbale yavo. Ependa limwe eli otali ulikile vakwao komutwe wondjaba. Owa shiiva tuu Ombibeli eshi tai popi kombinga yefimbo? Shikula ngaha:

■ Ne mu dhiladhile osho esimano ngele tamu kala mwa mwena tamu longo owala iilonga yeni e tamu longitha iikaha yeni ngaashi twe mu lombwelele 1 Tess.4:11

■ Manga mu na uyelele, itaalen uyelele, opo mu ninge aana yaKalunga. Joh.12:36

■ Ano inamu pangula sha manga ethimbo inaali thikana, Omuwa manga inee ya. 1 Kor.4:5

la kutya andola na kale e na uulongelwe u thike peni. Ondjokana ya tya ngeyi ya pula wo aasamane oyendji, unene mOndonga nomUukwanyama eliko noongombe odhindji.

Kepulo kutya omumati ngele ta pula okakadhona opo ya hokane, oha dhimbwa kutya ota ka adhika kuudhigu? Eyamukulo olyo ndika kutya kaku na omumati nenge omukadhona ta lombwele mukwawo kutya ngele twa hokana, otandi ke ku etela uudhigu komeho.

Opo ihe mpoka omumati nenge omukadhona ngele okwa mono uudhigu mondjokana, nena ota vulu okutokola omatokolo ge gi ili nogi ili.

Sho tatu ti omukadhona nandi pule a lombwele ndje nkene a tya, ngame ndi mu lombwele wo nkene nda tya; Omuwambo gwonale okwa tile: "Okwooko ihaku izi poshiteta."

Otandi vulu ngiini ndi iyambulule ngame mwene koshipala shomukadhona gwandje naye koshipala shandje? Ngele nani okwa hokwa ndje, "onguwo ompe kayi na oona."

Uudhigu moondjokana owa holoka olwindji shoka aasamane inaa simaneka ondjokana, omunyoli osho a holola. Ndishi kaku na omuyuuki nando ogumwe mondjokana, ongele omusamane nenge omukulukadhi. Kaku na nando ogumwe ha longo aluhe uwanawa koshipala shomukwawo.

Okuninga shila omuntu to ti kutya natu idhidhimikilathaneni. Osha yela nawa kutya kehe omuntu ohu uvu uudhigu ngele e u mono nenge e u ningilwa. Shoka owala tashi kwatha osho egalikano.

Aakiintu yamwe oya thigi po aalumentu yawo ngele mepipi lyopetameko nenge mepipi lyomuukuluntu noya hwatekele komau-ndingosho. Hoka aasamane yamwe mboka ya silwa aakulukadhi yawo naamati mboka ihaa tila sha, taa tameke ihe okukondja.

Opo ihe mpoka omaso taga taandele. Aatali yamwe otaa tameke ihe kutya iikumbu oyo ngaa yi na ondjo.

Pehulilo onda hala owala okutya; ongele omusamane, omukulukadhi, omumati nenge okakadhona, kala wa uva nawa kutya eiddhidhimikilathano olyo owala lya kaleka po oondjokana notali tungu.

Otu na wo okutseya kutya ngele tatu popi owala iikumbu, tse itaatu-kutha oompadhi dhetu tu ke yi pukulule momapuko twa mono yi li mo, nena itayi dhimbulula sha. Nokuli oshikumbu shono to ti oshopuudingosho, kashi na ethimbo okulesha miifo. Oshowo omusamane ngele okwa ningi gwo-puudingosho.

Otandi tsikile ko ishewe kutya aafuko mbono tatu ti iikumbu, naa ningwe ano ngiini? Ndika epulo. Sigo unake ta kala moluhepo nduno lweikalalo neimweneneno?

Ondi lwete oshoopala ngele ta mono natan-ango aanona ye, shi vule yamwe mboka taa longo iilonnga momilema iwinayi nongula oku uka kOngeleka anuwa oku na omapit-tilo.

Werner Ashondali

# Momumvo gwonuumvo gwAanona Oshigongi shAagundjuka osha li sha kala mehala lyawo lyiligongi mOngwediva okuza eti 26-30.9.79

Aagundjuka yongeleka ya Elok ye vule 700 nonuumvo oya li ya kala moshigongi shawo shokomumvo mehala lyawo lyiligongi nolyiilonga mOngwediva.

"Oshoka otse atuhe aana yaKalunga kokwiitaala muJesus Kristus". Gal.3:26, osho sha li oshipalanyolo shoshigongi shawo.

Ongulangula yeti 27 Septemba manga yi ikutha ashike omayeye gaalodhi, oya tsu omikweyo dhi li mbali okuza kongeleka yaNgwediva, nokweenda yu uka mongulu yawo yiigongi.

Opwa li nee gwandhimbo ta dhenge gwagonga mokuthaneka omathano. Aagundjuka oya li ya yelutha omapandela gawo, omanga epandela lyawo lyethigathano "FALENI KO EVAANGELI" li li komholela gomikweyo.

Potundi ontimugoyi yesiku ndyoka oshigongi osha tamekwa nelongelokalunga kaasita Heikki Ausiku naJosaphat Shanghala. Omuvithi okwa li omusita Matias Ngipandulua. Euvitho olya li lya kuthwa mu 1 Joh.3:1-2.

"Tu dhiladhileni elago lyaana yaKalunga mpoka li thike. Ooitaali ayehe yomuuyuni otaye mu galikanene kuKalunga. Onawa ngele hamu uvu mboka taye mu galikanene mombepo nomoshili."

"One aaholike yaKalunga, oshoka okwe mu ningi oyana. Omu na elago sho mu li aana yaKalunga. Titus 3:4-8. Okwe tu valululitha opo tu ninge aape naanelago. Ne omwa tseye Kalunga, nuuyuni ihau mu dhiladhila. Joh.15:18-19;16:33."

"Otamu ka kala mwa fa Jesus. Ngele a holoka otatu ke mu mona ngaashi e li. Indila Kalunga megalikano e ku lundulule u fe Jesus. mokutonda uulunde mboka hau hala oku tu idhingila, nelago ndika oto li mono puKalunga nopuJesus."

Konima yelongelokalunga omusita gwaagundjuka mongeleka Josaphat Shanghala okwa gandja ehokololo lyoshilonga mokati kaagundjuka okuza 1 Kotomba 78 sigo 27 Septemba 79.

Tate Shanghala mokuhulitha ehokololo lye, okwa thigile aagundjuka omanenedhiladhilo ngaka:

a) Oshigongi shaagundjuka aakriste Aanamibia ayehe 1980? Eindilo li uke kooengeleka dhaNamibia dhahangana.

b) Oshigongi shaagundjuka aakwaLuther muNamibia alihe? andola egongalo kehe li kalelwepo kaagundjuka yaali ayeke.

c) AayElok tu kale ngaa aataambi yoshigongi muka mOngwediva.

d) Ouniforma (omuzalo gwa faathana) yaagundjuka AayElok otamu yi tile ngilini?

e) KoSenegal naku yiwe nenge ku tungwe sha?

Tate Shanghala okwa tseyitha wo kutya omumvo tagu ya kuCanada otaku ka kala oshigongi shaagundjuka Aakwaluther muuyuni auhe meti 10-13 Juli 1980.

## ONTANDA KUUPUNDI

Osha li oshiningwanima moshigongi shika sho aagundjuka ya yi kOntanda yawo kUupundi ndjoka ngiika pwa piti omimvo odhindji inaaku yiwa. Aagundjuka oye ende ookilometa dhi vule yimwe kolupadhi okwaadha ehala lya tya ngaaka.

Pehala mpoka opu na oshuuvithilo, no sho wo owalitali ya tungwa niiti. Ehala lyo lyene ewanawa nokutala nosho wo nokulala. Pehala mpoka opwa ningilwa otundimbimbeli komusita Heikki Ausiku pamadhiladhilo nga: Eps.83-8.

## OMUNTU OSHIKE?

- Omuntu oye oshishitwa
- Omuntu oye omunandjo
- Omuntu oye Omuhupithwa

## Kiina tali tambula oukriste

Omafaneke okuyululula eeveta kombinga yelongelokalunga lopakriste okwa ningwa paife mefinamhango loshilongo shaKiina, nelongekido loveta ipe oli li metifa, ei tai londwele ovalongi vomepangelo kutya otava ka shikulwa ngeenge tave lidopo moinima yelongelokalunga ngashi okuhanau na po eengeleka ile okuhwika po Eembi-beli davo.

Vali shikwao sha fimana osheshi Epangelo laKiina paife otali kwafa omaongalo okwiimonena Eengeleka nokushunifila ovafita novakriste vakwao efimano, eshi kwa li hava ulwa nai kulo nokulundilwa vati ihava popile epangelo, onghedi ya tya ngaha oye va kanifita eendjabi nomaukalata ehavalo.

Ashishe eshi osha hokololwa komufitangalo Dr. Andrew Hsiao, omupresidende wopedu wOngongahangano yOvakwaluther (LWF) noku li yo omukuluhufikola mOseminali youfita mu Hong Kong.

(PALI)

Pokati kiipipiwa oongundu dhomalwii-mbo odha kala tadhi kutha ko. Opwa li wo ondjimboshituthi ya totelwa owina oshituthi kuLavinia Neliwa, pashipalanyolo shomumvo gwonuumvo:

"Oshoka atuhe otse aana yaKalunga mo-kwiitaala muKristus Jesus". Gal.3:26.

## FALENI KO EVAANGELI

Olyo epandela lyaagundjuka lyOengeleka ayihe. ndyoka hali kondjelwa pakugongelwa kwiiniwe. Omumvo gwa-zi ko koshigongi shokEngela, olya li lya yi negongalo lyaShakati, sho ya li ya gongele R1013.20.

Moshigongi shonuumvo natange tuu epandela ndyoka Aashakati inaye li etha sho ya gongele R750-00.

Aagundjuka ayehe mboka ya li koshigongi oyi ifutile yo yene iihauto yi ya ete. Shika osho oshiningwanima shotango noshopahistoli mongeleka yetu ayihe, aagundjuka taa ifutile olweendo lwawo ya hupithe iimaliwa yoshiketha.

Aagundjuka oya li ya hwama okupula omapulo gomaludhi gi ili nogi ili, ngoka gomugo gamwe ga yamukulwa moshigongi manga gamwe omolwethimbo ga tegithwa komeho.

Oshigongi csha hulithwa nuulalelo Uuyapuki kaasita yaagundjuka mlitayingeleka ayihe ine. Naagundjuka oya londo omahauto gawo nokwiihakana ethimbo lyongashingeyi, unene mboka yokokule.

Oshigongi csha li mombepo ombwana-wa, ongaamwayinathana lela muKristus.



Aana yaKalunga otaa imemcha aluhe nomethimbo lyoothina nomaudhigu. Ombili oyomomwenyo kaagu na eiuvo lyongunga.

# Eyooloko pokati keshasho nekoleko

ku V.Munyika

Onda hala ndi ku yelifile apa kutya oshipalanyole eshi osha kwatelela mo omadiladilo avalu manene, hamongeleka ashike yetu, ndelene omounyuni aushe. Ovateologi vahapu ova nyola nale omambo manene ngee okeshasho ile okekoleko.

Oshipalanyole eshi oshimwe yo shomwaa- yo ya eta eenhamanana pokati kEengeleka, odo da twala fiyo ometopoko nokuli. Ngeenge handi ka popya omapuko apa, itandi shi ningi shaashi handi kondjifa ngeni ehongo lOngeleka yange, ndele pamwe omolwaashi opo pe fike eshiivo lange musho.

## Eshasho oshike?

Inandi hala okuya momadiladilo eshasho oo taa monika mEtestamendi Likulu, osheshi onde lineekela osha yela nale. Ngaashi efukaleko la kala omuvelo wokupitila moujuda, osho yo eshasho li li omuvelo okuninga omona waKalunga nomukriste.

Meshasho ohatu ningwa oinhimbu yolutu lwaKristus, nokutya Ongeleka. MOKatiki- sha kanini ep. 26 ohatu lesa enyamukulo kepulo eshasho oshike. Nokutya kali fi omeva ongaho, ndele omeva a kwatela kumwe koshipango shaKalunga neendjovo daye.

## Ombibeli otai popile tuu eshasho?

Epulo eli olā pulwa alushe peemhata deshasho ngee olounona ile lovakulunhu. Luhapu haku pulwa yo nokuli kutya meshasho oshike tashi tu dile mo.

Fye otwa itavela moshipango shetumo osho shi li muMateus 28:19 kutya ovo va shashwa palombwelo eli, otava xupifwa shili. Osheshi opa shangwa kutya, ou ta itavele ndele ta shashwa, oye ta xupifwa.

Kombinga yeshasho ohatu dudu okulesha eendobwedi dihapu mEtestamendi Lipe: John.3:5 Oil.2:38; 22:16 Rom.6:3 Gal.3:27 Kol.2:12. Eshi osha hala kutya, nande eshasho inali fatululwa mOmbibeli, ola popiwa sha yela. Kape na vali evelishe tadi kondjifa odo da yandjwa metetekelo.

Jesus okwe tu hongwa kutya meshasho olo liyapuki, omo hatu ningi ovahongwa vaye novana vaKalunga. Meshasho ohatu diminwa po yo omatimba etu.

Meshasho ohatu xupifwa keenghono nokehandu loufyuululwalunde. Ohatu pewa efilonghenda laKalunga, onghe nounona ove na okushashwa shaashi ova pumbwa yo efilonghenda olo.

Meshasho omo amuke hatu xupifilwa mbela? Ohowe, eshi hasho twa itavela. Osheshi Kalunga iha nyengwa kusha nokeenghono daye, ta dudu okuxupifa omunhu ngaashi ye mwene a hala.

Inandi itavela kutya okanonna ka fya inaka shashwa, oka yuka ashike moheli. Ndele nande twa itavela ngaho, itatu ekeleshi eshasho lounona nandenande. Ombibeli inai yoolola, oya fi ashike; ka shasheni oiwana.

Meshasho omunhu ota udanekelwa exupifo nomwenyo waalushe. Otali yandje efilonghenda naKalunga moukwatatu waye. Efilonghenda eli hali yandjwa meshasho, otali kala li na eenghono mokukalamwenyo kwomunhu oo alushe.

Ita pumbwa vali efilonghenda limwe. Meshasho Kalunga ota ningi omaudangko nafye nehangano lipe nafye. Ote tu udanekela kutya, ota kala noku tu dimina po omatimba etu melidilululo lashili. Eshi osha hala kutya; eshasho oshitwa shopokati oko keshe omukriste e na okukala a fikama.

## Eshasho lounona

Mouhanana wOngeleka, eshasho lounona kala li ko, osheshi ovo va longwa tete oukriste, ova li Ovajuda ovo va shiiva nale kombinga yehalo laKalunga komunhu kutya ola tya ngahelipi.

Eshi nee Ongeleka ya kula, ounona vovakriste ova hapupala mOngeleka nova li ashike ve na okushashwa. Okuteelela va kule vo ve ke lishashife voovene, osha li sha yehama. Yo Ongeleka oya li ngaho ya hala oilyo ipe.

Inandi lineekela pe na ou ta fininike kutya eshasho lounona ola popilwa sha yela kOmbibeli. Ndele nande ongaho, ope na ngaho eendobwedi tadi shi ulike nawa.

Ngaashi muMateus 19: Mark.10: Luk.18:1 naMat.18:10, eshasho otali popilwa sha yela. Kombinga imwe oshipango shetumo inashi fiya ounona pondje, ndele oshe va kwatela mo-yo.

Eshasho lounona oli na omaupyakadi alo. Ndele shashi olo la dala ekoleko, pitike nge ndi ye koshitopolwa shekoleko manga.

Taku twikilwa



Eshasho kali shi omeya ageke, aawe. Olyo omeya mumwe neuvaneko lya Kalunga.

## Oshiponga shokunwa oikolwifa otashi popilwa

Oshiwana oshiholike, oshiwa ngeenge hatu li kelele okunwa oikolwifa. Ngeenge hatu li kelele nena eendunge detu itadi nyonwapo. Osha yuka unene okukala ihatu danene oikunwa osheshi ava hava nu kave na vali eudeko, netilo okutula ovanhu osho yo okutula Kalunga, okwa kana.

Otashi dulika omunhu e uye mongeleka a kolwa nokuhena oumbada, ile a longife omaimbilo mayapuki moukolwe waye. Oshiwana hano tu likeleleni oikunwa manga tu lyeni mefimbo lounona.

Osho yo oikunwa tai dipaa eendunge diwa momunhu, ta ningi omufyona. Shashi nande na longwe oinima, otai hanaunwa po mokunwa. Vamwe nande nava longwe oimaliwa kOushimba eshi te u ya, aisho ofilu. Vakwao vamwe otava nwine koilonga nokuli.

Oikunwa oshiponga shinene. Otai dipaa yo omunhu molutu lwaye, ndele molutu ohai li mo omapunga osho yo omunhu ta fi nokuli diva-diva. Ovahakuli vomikifi ove shi tonga nokuli kovanaudu vahapu

nokutya omolwokunwa owa nyona po olutu lwoye mwene.

Ovanafikola tu kaleni oshihopaenenwa shiwa, osheshi ngeenge to ya peumbo ile pomukunda nde manga inali pita ove ova kolwa, nena oshi li sha yela kutya naava inava mona ofikola otava ti ashike walye, vo naava va longwa otava nhu, kashimba kashi shi oshiponga. Naye ota hovele okunwa osheshi okwoove ta kufa oshihopaenenwa. Lungama uha yandje oshihopaenenwa shii movamwanyoko.

## Didilika

Kashi fi omhangano ndele ehongelo opo tu kule tuu shii owii woikunwa. Taleni ovanhu ngenge va nu, keshe umwe ta hovele

# Ova shangela nge tava tii....

Ngame mwene kandi shi naanaa omunapolotika, ihe onda hala ngaa ndi ete omadhiladhilo gandje kune aaleshi yOmu-kwetu.

Tse otu li momukundu gwevi lyetu Namibia, tu li mo twa mangwa kepangelo lya S.A. Otatu kambadhala epangelo ndika li ze po. Ano omolwashike pu na oongundu dhimwe ngodhoo DTA nooAtur, ndhoka dhi na aawiliki aatiligane ya za ku S.A, nodho tadhi kondjele emanguluko?

Ano aatiligane mbano oya mangwa kulye nokepangelo lini po? Oshilimbilika sho yamwe yoongundu dhimwe haa ka konga oondunge kungoka e ya pika.

Aatiligane sho ye ya muAfrika, katwa li onkwatwa dhomuntu, katwa li aapika, ihe oye ya e taa tu kolonyeke.

**T. T. Pale**

XXXXXXXXXX

Yayee ngame omuvali Omunamibia ndu uvite uudhigu nondi na eyeme ethimbo kehe molwevi lyetu. Aamwandje ya ka ninga oontembuki naayendaguli miihwa, ya fa liyamakuti.

Ngame omuvali, omunamupya, aamwandje ya ningi oondjendi. Kalunga uva omagalikano getu omolwevi lyetu. Aamwandje aaholike onde ya yuulukwa nonda hala oku ya mona.

**Saara K. Nampala**

XXXXXXXXXX

Nande tu lyeni mefimbo eli lounyuni wa ombokelwa, womahepeko, wa kanifa ombili, omo yo omukriste keshe u na omhito yokuya kuKalunga meilikano.

Jesus ta ti: "Ashishe eshi ta mu indile medina lange kuTate, ote shi mu ningile."

Vahapu ihava ilikana vali. Vakwetu efimbo eli, Omwene Kalunga ota teeleele omalikano nomaindilo etu. Tu pendukeni meemhofi fye tu indileni.

**S. Hamuyela**

XXXXXXXXXX

Atuhe muNamibia otatu lili iilonga iwinayi, omahepeko nomadhipago taga ningwa mevi lyetu esiku kehe. Owa ndhindhilika tuu kutya iinima mbika ayihe ongoye ho yi eta, ngoye sho holopota iinima waa yi shi.

Etha elopoto, galikanena aamwanyoko handiyaka yongamba, galikanena aapangeli yeve lyeni, galikanena mboka taa longele oshigwana shoye tu galikaneni twaa na ezimbuko.

**T. Nd. Max**

Otandi pandula unene kaamwameme amuhe hamu holola omagano geni mOmu-kwetu Inamu shi ninga koonkondo dheni, ihe ehala lyaKalunga tali longo mune.

One sho mwa vulika tango, otamu vulu wo okuvulikitha mboka taa mu uvu ko. Inamu loloka, Kalunga ketu opo e li. Omukwetu, dhiginina oshilonga shoye.

Dhiginina egalikano, ndika olyo ekundo lyeni amuhe.

**S. Amaambo**

## AAGUNDJUKA

### ILONGEKIDHILENI OOSIKOLA

Onda hala ndi ku lombwele omumwame-me omumati nomukadhona ngoka wa kuutumba megumbo wi ikonda mo mosikola. Iigwana ayihe ya putuka ngashingeyi otayi thiminikile oyana komanongelo. Ngoye Omunamibia, owa hala u ka kale mOnamibia ya tya ngiini?

Aaluudhe unene mOnamibia otwa fa inaa-tu tseyana natango kutya onakuyiwa yetu oya tya ngiini. Aakuluntu natango onkene tatu kuutumba momagumbo naanona yetu yi ikonda moosikola.

Oyendji sigo oompaka otatu itangele omapiya niimuna. Eeno shili, ihe haunene tashi tu gwanene we shoka. Iinima ayihe otayi endeke pamwe nethimbo, mpoka pu thike eputuko lyoye opo wo pu thike oompumbwe dhoye.

Tu tonatitheni ano omeho getu tu taleni kutya onakuyiwa oya tya ngiini notayi ka pula shike. Otatu ka nyanyukwa ngele tatu ka kala moshilongo shetu twa longa oshilumentu.

**A.H.Asino**

# Kalunga awike,— omunapolotika a ti

"Itatu piti ngele itatu ithanene Kalunga momaudhigu getu," osho sha tiwa kuGo-he Matenge, amushanga omukuluntu gwii-nima yomeni lyoshilongo mepangelo lya-Botswana.

Moshigongi shehangano lyaakulukadhi yOngeleka yaAnglikani, omusamane Matenge okwa ulikila aakulukadhi ya tseye mpoka tapu ya zile eyamukulo momaudhigu gethimbo ndika sho a ti:

"Ekwatho lyeni noonkondo okuKalunga tayi zi mu vule okulonga iilonga ya simamana yi vule noyaalumentu.

Okwa dhimbulukitha ishewe oshigongi kutya uuyuni owa thikamenwa komikundu odhindji, ihe Kalunga awike ta vulu oku dhi mana po.

"Itatu piteni nando momikundu dhetu ngele inatu ithanene mo Kalunga," osho a ti.

Mokufatulula elongelokalunga lyaakriste lyesiku kehe, okwa ti kutya yamwe ohatu tala mboka taa yi komambo aluhe kutya oku ki imba owala oondjimbo, ihe oshinima oshi vule po mpoka.

"Oonkondo dheni okuKalunga tadhi zi mu vule okulonga iilonga ya simana", osho a kumagidha.

Omusamane nguka okwa zimina wo Ongeleka yi kale mopolotika, nando haandjoka tayi longithwa kEpangelo. Okwe shi yelitha ngeyi.

"Uupolotika wOngeleka okudhimbuluthathana nokupukululathana, ihe haku ulikathana ominwe dhomapuko", osho a londodha.



Aailongi, ethimbo lyomakonakono olya ti ko, omambo naga leshwe.



Oomwedhi ndhika dha zi ko, ombinga onene mOwambo otayi hepekwa koluhepo lwomeya. Oomeme oye ende ookilometa odhindji ya konge omeya gokunwa okwiyyoga nokuyoga.

Aalumentu oyendji oye etha po oshinakugwanithwa shawo okuhupa omeya momithima nomomatope. Aakiintu oya ningi aakongi yomeya nomevi. Emianguluko lyaakiintu oli li momvula.

Oto tseya tuu shono Ombimbeli tayi hokolola kombinga yomeya noshiyuma? Ou shi mpoka dhi li? Landula ano ngeyi:

■ Moses okwa lombwele Aaron: Kutha oshiyuma ngu pipile mo omana ogomeri yimwe ngoye u shi tenteke koshipala shOmuwa yi pungulilwe sigo oluvalo nolualo 2 Mos.16:33

■ Oyo taa kuta konyama yoshigwana shandje notaye ya yugu oshipa shawo, notaa nyanyagula omasipa gawo taye ga hahala ngaashi onyama yombelala tayi tetelwa mombiga Mik.3:3

■ Oondjendi noohepele ohaa kongo omeya, go gaa po. Elaka lyawo olya kukutula Kenota. Ihe ongame Omuwa nda hala oku ya uva Jes.41:17

■ Penduka po, lila nokulililila uusiku pethimbo lyomalangelo gongulohi, Omwenyo gwoye gu pupula mo ngaashi omeya koshipala shOmuwa, Ontak.2:19

■ Ngele to pitile momeya ongame ondi li pungoye nongele ku na omilonga dhomeya, itadhi ku yelula eyelu. Jes.43:2

1.

*Ndi li awike mokapangelo  
Ndi li mo andike ti,  
Oilonga yange okuhakula -  
Ovanaudu voludi keshe.*

2.

*KOmumbwela kOmukwanghala,  
Omundonga nOmukwanyama,  
Omweendanandjila nomunahambo,  
Omo tava yakulwa.*

3.

*Komikifi doludi keshe,  
Nado tadi holoka,  
Wombulwa noshitumba ta pula,  
Eumbo lomuhakuli apa li li.*

4.

*Ngee wa holoka po puye,  
Elipulo omwenyo woye tau ti.  
Ohandi mu kwafa ngeheli vakwetu?  
Ndele diva enyamukulo oto pewa.*

5.

*Omutilima weni inau tila,  
Omutilima weni inau tila  
Inamu kala noumbada washa,  
Ondi li pamwe nanye alushe,  
Katee ounyuni otaw xulu.*

6.

*Pamwe naJesus moilonga,  
Itatu pumbwa okutula.  
Oye omundokotola mokapangelo,  
Oye omuyandji womiti detu.*

7.

*Ombili yaJesus nge u na yo,  
Oudja nande opo u li.  
Oyo tai loteke epuke loye,  
Noupongo woye owa xula po.*

*(Dorkas Fumalekuu)*

## ILANDELA OMUKWETU 1980

Ino hala u kundane mOngeleka nomuuyuni? Udhitha ano okafooloma hoka pevi.

Teta mpaka \_\_\_\_\_

EDHINA: .....

ONDJUKITHI .....

Onda tula mo oor.....

## OMUKWETU

Oye oshifo shOngeleka Onkwaevangeli paLuther yomOwambokavango. Oha nyanyangidhwa mOshinyanyangidho shOngeleka mOniipa. Omukuluntu gwoshifo omumbisofi dr. Leonard Auala. Ondando yOmukwetu komumvo muAfrika R 2-60, kombanda yomafuta R 5-00. Omambesitelo pamwe noondando naga tumwe kOmukwetu Oniipa, P/B. 2013 Ondangwa 9270

OWAMBOKAVANGO CHURCH PRESS  
ONIIPA P/BAG 2013 ONDANGWA 9270